

四庫全書

史部

欽定四庫全書

資治通鑑後編卷一百三十七

刑部尚書徐乾學撰

宋紀一百三十七

起旃蒙作噩正月盡強圉
大淵獻十二月凡三年

理宗建道備德大功復興烈文仁武聖明安孝皇

帝

寶慶元年春正月壬戌朔詔舉賢良 庚午湖州人潘

壬與其弟丙從兄甫以史彌遠廢立不平乃遣甫密告

謀立濟王意于李全全欲坐致成敗陽與之期日進兵
應接實無意也壬等信之遂部分其衆以待及期全兵
不至壬等懼事泄乃以其黨雜販鹽盜千餘人結束如
全軍狀揚言自山東來夜入州城求濟王竝竝聞變匿
水竇中壬尋得之擁至州治以黃袍加竝身竝號泣不
從壬等強之竝不得已乃與約曰汝能勿傷太后官家
乎衆許諾遂發軍資庫金帛會子犒軍知州謝周卿率
官屬入賀壬子偽為李全榜揭於門數吏彌遠廢立罪

且曰今領精兵二十萬水陸並進人皆聳動比明視之則皆太湖漁人及巡尉兵卒耳竑知事不成乃遣王元春告于朝而帥州兵討壬士變姓名走楚州丙甫皆死元春至臨安彌遠懼甚急召殿司將彭任帥師赴之至則事平矣壬至楚州為小校明亮所獲送臨安斬之彌遠詐言竑有疾令客秦天錫召醫入湖州視之天錫至諭旨逼竑縊于州治以疾卒聞尋追貶為巴陵郡公起居郎魏了翁考功員外郎洪咨夔相繼言竑之寃及禮部

侍郎直學士院真德秀入見奏曰三綱五常扶持宇宙之棟幹奠安生民之柱石晉廢三綱而劉石之變興唐廢三綱而安史之難作我朝立國根本仁義先正名分陛下初膺大寶不幸處人倫之變有所未盡流聞四方所損非淺雪川之變非濟王本志前有避匿之迹後聞捕討之謀情狀本末灼然可考願詔有司討論雍熙追封秦卽舍罪卹孤故事斟酌行之雖濟王未有子息興滅繼絕在陛下耳帝曰朝廷待濟王亦至矣德秀曰若

謂此事處置盡善臣未敢以為然觀舜所以處象則陛下不及舜明甚人主但當以二帝三王為師秦漢而下人君舉動不皆合理難以為法帝曰亦是一時倉卒耳德秀曰此已往之事惟願陛下知有此失益講學進德以贖前愆以收人心昔太平興國中秦邸事作太子太師王溥等議於朝堂者七十有四人然後有詔裁決以大事不可輕也康定慶厯間求西帥必取當時第一流宰相呂夷簡至忘讐薦進以重任不可輕也邇者雪川

之獄未聞有參聽于槐棘之下者又如淮蜀二閫之除
皆出僉論所期之外天下之事非一家之私何惜不與
衆共之朝廷之於天下當如天地之於萬物栽培傾覆
付之無心可使有一毫私意於其間哉當乾道淳熙間
有位於朝者以饋遺及門為耻受任於外者以苞苴入
都為羞今貨賂公行薰染成風恬不知怪治世氣象欲
其寬裕不欲其迫蹙曩者以訛言之今至於流竄殺戮
都城之民揺手相戒朝廷之上敏銳之士多於老成政

事之才富於經術雖嘗以耆艾褒傅伯成楊簡以儒學
褒柴中行以恬退用趙蕃劉宰至於忠亮敢言如陳宓
徐僑皆未蒙錄用願處伯成簡於內祠置中行於經幄
擢宓僑於言地德秀又奏華髮舊德之臣不獨人主賴
其益朝列新進之士亦有所矜式伯成簡皆踰年八十
縱使召之不至必能因囊封以進忠言又奏長人之官
撫字不聞叨憫日甚帝曰如何無一廉者又問何以草
之德秀奏此在朝廷用舍黜陟之間示以意向帝又問

卿曹見有何廉吏德秀以表守起箴夫對因言崔與之

帥蜀楊長儒帥閩皆有廉聲臣一時不能悉數乞廣加

咨訪史彌遠深忌之

考與秦天錫薛鑑作余按余天錫昌國人史彌遠嘗為弟子師今訪

宗子為沂王後遂引與昌與尚見彌遠與昌即理宗也宋史余天錫傳無逼死濟王事此召醫視疾者自是其

容秦天錫理宗紀宗室傳皆作秦今從之

蒙古武仙聞彭義斌復山東州

縣乃叛蒙古殺河北西路都元帥史天倪弟天澤

時護母歸燕府僚王守道追天澤于道告之故且曰變

起倉卒部曲散在近郊公能迴轡不招自至天澤曰不

共國之讐死亦當往況未必死耶遂傾貲裝易鎧仗南
還行次滿城得士馬甚衆遣監軍李伯祐詣國王博囉
言狀且乞濟師博囉即命天澤嗣兄職遣實訥台率銳
卒三千援之合勢進攻仙驍將葛鐵槍擁衆來拒天澤
迎擊之生擒葛鐵槍餘衆悉潰乘勝至中山畧無極拔
趙州仙敗奔走西山天澤遂復真定博囉穆呼哩子也
二月甲午詔賜故太師鄂王岳飛謚忠武 丙申命
師彌嗣秀王師彌師岳弟也 許國至鎮李全妻楊妙

真却迂國辭不見妙真慙而歸國既視事痛抑北軍有
與南軍競者無曲直偏坐之犒賞十損八九全自青州
致書于國國誇于衆曰全仰我養育我畧示威即奔走
不暇矣全因留青州國不能致乃數致厚餽邀全還劉
慶福亦使人覘國意國左右語覘者曰制置無害汝等
意慶福以報全全集將校曰我不參制閫則曲在我今
不計生死必往見遂還楚州上謁賓贊戒全曰節使當
庭趨制使必免禮及庭趨國端坐納全拜全退怒曰全

歸本朝拜人多矣但恨汝非文臣本與我等汝向以淮
西都統謁賈制帥亦免汝拜汝有何勲業一旦位我上
便不相假借耶全赤心報朝廷不反也國繼設盛會宴
全遺勞加厚全終不樂慶福謁國之幕客章夢先夢先
令隔簾貌喏慶福亦怒既而全欲往青州恐國苛留自
計曰彼所爭者拜耳拜而得志吾何愛焉更折節為禮
因會集間出劄白事國見其細故判從之全即席再拜
謝自是動息必請得請必拜國喜曰吾折伏此虜矣全

往青州國集兩淮馬步軍十三萬大閱楚城外以挫北
人之心楊妙真及軍校留者懼其謀已內自為備初全
遣慶福還楚城使為亂適湖州潘壬事敗全黨益不安
或教妙真畜一妾男子指謂人曰此宗室也且語僚佐
曰會令汝為朝士潛約盱眙四軍為應皆不從慶福謀
中輟止欲快意於國計議官苟夢玉知之以告國國曰
我豈文儒不知兵者耶夢玉懼禍及復以告慶福一日
國晨起視事忽露刃充庭客駭走國厲聲曰不得無禮

矢已及顙流血蔽面而走亂兵悉害其家縱火焚宮寺
兩司積蓄盡為賊有親兵翼國登城絕而走賊擁通判
姚翀入城犒兩軍使歸營慶福首殺章夢先以報其辱
國縊于途事聞史彌遠懼激他變以徐晞稷嘗倖楚守
海得全歡心乃授晞稷淮東制置使令屈意撫全全聞
國死自青還佯責慶福不能彈壓斬數人上表待罪朝
廷不問知揚州趙范得制置使印于潰卒中以授晞稷
晞稷至楚全及門下馬拜庭下晞稷降等止之賊衆乃

悅晞稷至以恩府稱全恩堂稱妙真初楚城之將亂也有吏竊許國書篋二以獻劉慶福皆機事慶福未之發全發緘讀之有廟堂遺國書令圖全者全大怒又有苟夢玉書全始惡夢玉反覆乃殺之三月癸酉攢仁文哲武恭孝皇帝于永茂陵廟號寧宗夏四月辛卯朔祔寧宗神主于廟時皇太后垂簾人多言本朝世有母后之聖太后兄子萬壽觀使石獨曰事豈容概言昔仁宗英宗哲宗嗣位或尚在幼冲或素由撫育軍國重

事有所未諳則母后臨朝宜也今主上熟知民事天下
悅服雖聖孝天通然不蚤復政得無基小人離間之嫌
乎乃密疏章憲慈聖宣仁所以臨朝之由遠及漢唐母
后臨朝稱制得失上之太后覽奏即命擇日撤簾丁酉
降手書以多疾罷垂簾聽政壬寅帝兩請太后垂簾不
允已未以端明殿學士薛極僉書樞密院事

考異按
宋史理

宗紀不書今據
宰輔表書之

五月甲子詔内外文武大小之臣於

國政有所見聞封章來上母或有隱權工部侍郎喬行

簡應詔上疏曰求賢求言二詔之頒果能確守初意深求實益則人才振而治本立國勢張而姦宄銷臣竊觀近事似或不然夫自侍從至郎官凡幾人自監司至郡守凡幾人今其所舉賢能才識之士又不知其幾也陛下盖嘗撫其一二欲召用之矣凡内外大小之臣囊封來上或直或弼或切或泛無所不有陛下亦嘗撫其一二見之施行且褒賞之矣而天下終疑陛下之為具文盖以所召者非久無宦情決不肯來之人則年已衰暮決

不可來之人耳彼風節素著持正不阿廉介有守臨事
不撓者論薦不多固未嘗召也其所施行褒賞者往往
皆末節細故無關理亂粗述古今不至抵觸然後取之
以示吾有聽受之意其間亦豈無深憂遠識高出衆見
之表忠言至計有補聖聽之聰者固未聞采納而用之
也自陛下臨御至今班行之彥麾節之臣有因論列而
去有因自請而歸其人或以職業有聞或以言語自見
天下未知其得罪之由徒見其置散投閒倏來驟去甚

至廢罷而錫褫削奪而流竄皆以為陛下黜遠善士厭惡直言去者遂以此而得名朝廷乃因是而致謗其亦何便於此且言羣賢方集願勿因濟王議有異同致其渙散進士并研鄧若水上封事曰行大義然後可以弭大謗收大權然後可以固大位除大姦然後可以息大難寧宗皇帝晏駕濟王當繼大位者也廢黜不聞於先帝過失不聞于天下史彌遠不利濟王之立夜矯先帝之命棄遜濟王並殺皇孫而奉迎陛下曾未半年濟王

竟不幸死於湖州揆以春秋之法非弑乎非篡乎非攘
奪乎當悖逆之初天下皆歸罪彌遠而不敢歸過於陛
下者何也天下皆知倉卒之間非陛下所得知亦諒陛
下必無是心也亦料陛下必能掃清妖氛以雪先帝濟
王父子終天之憤今踰年矣而乾剛不決威斷不行無
以大慰天下之望昔之信陛下之必無者今或疑其有
昔之信陛下之不知者今或疑其知陛下何忍以清明
天日而身受此汙辱也蓋亦求明是心於天下而俾有

辭於千古乎為陛下計莫若遵泰伯之至德伯夷之清
名季子之高節而後陛下之本心明于天下此臣所謂
行大義以弭大謗策之上也自古人君之失大權鮮有
不自廢立之際而盡失之當其廢立之間威動天下既
立則眇視人主是故強臣挾恩以陵上小人怙強以無
上久則內外相為一體上喑默以聽其所為日朘月削
殆有人臣之所不忍言者威權一去人主雖欲固其位
保其身有不可得宣繒薛極彌遠之肺腑也王愈其耳

目也盛章李知孝其鷹犬也馮樹其爪牙也彌遠欲行
某事害某人則此數人者相與謀之曷嘗有陛下之意
行乎其間乎臣以為不除此數人陛下非惟不足弭謗
亦未可以必安其位然則陛下何憚久而不為哉此臣
所謂收大權以定大位策之次也次而不行又有一焉
曰除大姦然後可以弭大難李全一流民耳寓食於我
兵非加多土地非加廣勢力非特盛也賈涉為帥庸人
耳全不敢妄動何也名正而言順也自陛下即位乃敢僭

強何也彼有辭以用其衆也其意必曰濟王先皇帝之子也而彌遠放弑之皇孫先皇帝之孫也而彌遠戕害之其辭直其勢壯是以沿淮數十萬之師而不敢睥睨其鋒雖曰今暫無事安知一日不羽檄飛馳以濟王為辭以討君側之惡為名彌遠之徒死有餘罪不可復惜宗社生靈何辜焉陛下今日誅彌遠之徒則全無辭以用其衆矣上而不得則思其次次而不得則思其下悲夫丙寅命不熄嗣濮王許國既死李全牒彭義斌

于山東曰許國謀反已伏誅矣爾軍並聽我節制義斌
大罵曰逆賊背國厚恩擅殺制使我必報此讐乃斬齎牒
人南向告天誓衆見者憤激於是全自青州攻東平不
克乃攻恩州義斌出兵與戰全敗走獲其馬二千劉慶
福引兵救全又敗全退保山峒抽山陽忠義以北楊妙
真及劉全皆欲親赴難會全遣人求晞稷書與義斌連
和乃止義斌致書沿江制置使趙善湘曰不誅逆全恢
復不成但能遣兵入淮進據海以威之斷其南路此賊

必擒賊平之後收復一京三府然後義斌戰河北盱眙
諸將襄陽騎士戰河南神州可復也盱眙四總管亦各
遣使致書乞助討賊知揚州趙范亦以為言史彌遠戒
范無出位專兵各享安靖之福范復以書力論之曰先
生以撫定責之晞稷而以鎮守責之范責晞稷者誣人
之事也責范者矢人之事也既責范以惟恐不傷人之
事又禁其為傷人之痛惡其為傷人之言何哉且賊見
范為備則必忌而不得以肆其姦他日必將指范為首

禍激變之人劫朝廷以去范先生始末之信也左右曰
可卿大夫曰可先生必將曰是何惜一趙范而不以紆
禍哉必將縛范以授賊而范遂為宋鼎錯雖然使以范
授賊而果足以紆國禍范死何害哉諺曰護家之狗盜
賊所惡故盜賊見有護家之狗必將指斥於主人使先
去之然後肆穿窬之姦而無所忌然則殺犬固無益于
弭盜也欲望矜憐別與間慢差遣彌遠不聽 趙范趙
葵金子才用降人谷用安之言欲乘時撫定中原建守

河據關之議以聞于朝乃命趙范開閘于光黃之間淮
西運判杜杲力陳出師之害大畧曰臣備員邊臣切見
沿淮旱蝗連歲薄收加以調遣無度輦運不時生聚蕭
條難任征役中原板蕩多年不耕無糧可因千里饋運
師不宿飽若虛內以事外移南以實北腹心之地豈不
可慮時在外諫北伐者惟杜杲一人及師衄洛陽退師
保境兵燹遂開始伏杲先見 六月辛卯太白晝見
丁未加史彌遠太師封魏國公彌遠辭太師許之 彭

義斌既克山東復納李全降兵兵勢大振遂圍東平嚴
實潛約蒙古將布爾罕合兵攻之兵久不至城中食盡
乃與義斌連和義斌亦欲藉實取河朔而後圖之遂以
兄禮事實時實衆尚數千義斌不之奪而留所掠青崖
之家屬不遣秋秋七月滁州大水詔賑恤之 乙酉行
大宋元寶錢 彭義斌下真定道西山與布爾罕等軍
相望義斌分嚴實以帳下兵陽助而陰伺之實知勢迫
即赴布爾罕軍與之合遂及義斌戰于內黃之五馬山

義斌兵潰史天澤以銳卒畧其後遂擒義斌說之降義斌厲聲曰我大宋臣義豈為他屬耶遂死之於是京東州縣復為實有實所統有全魏十分齊之三魯之九凡五十四城後又割大名彰德外屬而益以德充濟單四州時所在殘毀獨實境內治安四方之民爭赴之大理評事胡夢昱上書言濟王不當廢引晉太子申生漢戾太子及秦王廷美之事為證言甚切直史彌遠諷御史李知孝劾之除名羈管象州臨安府尹慶元袁韶獨

以夢昱無罪不肯署文書傅伯成抗疏救之不報夢昱
竟卒于貶所 初帝御清暑殿真德秀侍經筵進曰此
高考二祖儲神燕閒之地仰瞻楹桷當如二祖實臨其
上陛下所居處密邇東朝未敢遽當人主之奉今宮閣
之義寢備以一心受衆攻未有不浸淫而蠹蝕者惟學
可以明此心惟敬可以存此心惟親君子可以維持此
心因極陳古者居喪之法與先帝視朝之勤至是寧宗
小祥詔羣臣服純吉德秀爭之曰自漢文帝率情變古

惟我孝宗方衰服三年朝衣朝冠皆以大布惜當時不並定臣下執喪之禮孝宗崩從臣羅點等議令羣臣易月之後未釋衰服惟朝會治事權用黑帶公服時序仍臨慰至大祥始除韓侂冑柄政始以小祥從吉且帶不以金鞵不以紅佩不以魚鞍轡不以文繡此於羣臣何損朝儀何傷議遂格德秀屢進鯁言帝皆虛心開納史彌遠益嚴憚之乃謀所以相撼然猶畏公議未敢發也八月壬寅以司農丞姚子才封事切直詔進一秩授

秘書郎 癸卯詔知袁州趙簽夫直秘閣與監司差遣

以旌廉吏從真德秀言也 己酉地震 壬子帝以張

九成正色立朝有中興明道之功贈太師追封崇國公
謚文忠 甲寅詔求程頤後得四世孫源以為籍田令

乙卯罷直學士院真得秀考功員外郎洪咨夔初咨

夔言事剴切德秀嘗謂人曰讀洪考功封事德秀殊有
愧色其論臺諫失職有云月課將臨筆不敢下稱量議
論之異同揣摩情分之厚薄可否未決吞吐不能其相

率勇往而不顧者恭請聖駕款謁景靈宮而已臺臣深
銜之至是論濟王者衆史彌遠患之梁成大以知縣秩
滿待選諂事彌遠家幹萬昕昕一日言真德秀當逐成
大曰某若入臺必能辦此事昕達其語遂擢監察御史
成大因與莫澤李知孝共為彌遠鷹犬凡忤彌遠意者
三人必相繼擊之於是給事中王堅等駁德秀所主濟
王贈典莫澤等繼劾之遂命得秀提舉玉隆宮咨夔亦
言濟王寃成大等復交劾之鵠二秩由是名人賢士排

斥殆盡人目成大知孝與澤為三凶 丁巳詔戒貪吏
九月丙寅著作佐郎陶崇上保業慎獨謹微持久四事
帝嘉納之 冬十月癸巳有流星大如太白 十一月
癸亥以宣繒同知樞密院事薛極參知政事葛洪僉書
樞密院事詔邵州以潛藩升為寶慶府筠州與御名音
近改曰瑞州 甲申再貶魏了翁官罷真德秀祠祿前
胡夢昱貶時了翁出關餞別右正言李知孝遂指了翁
首倡異論將擊之史彌遠猶畏公議外示優禮改權工

夫朱端常劾了翁欺世盜名朋邪謗國德秀奏劄詆誣
詔了翁落職謫居靖州德秀落職罷祠李知孝上書乞
流竄德秀以正典刑梁成大亦言了翁雖經追竄人以
為罪大罰輕德秀狂僭悖謬不減了翁相羊家食彌遠
勸帝下其章帝曰仲尼不為已甚乃止成大貽書所親
曰真德秀乃真小人魏了翁乃偽君子此舉大快公論
識者笑之了翁至靖湖湘江浙之士不遠千里負書從

學乃著九經要義百卷訂定精密先儒所未有也德秀
既歸浦城撰讀書記語門人曰此人君為治之門如有
用我者執此以往 蒙古使人如高麗未至盜殺之自
是高麗與蒙古不通 彭義斌既敗武仙勢益熾潛令
謀者結死士匿真定城中大厯寺為內應仙夜斬關而
入據之蒙古史天澤出奔藁城 金內族王嘉努故殺
鮮于主簿權貴多救之者金主曰英王朕兄敢妄撻一
人乎朕為人主敢以無罪害一人乎國家衰弱之際生

靈有幾何而族子恃勢殺一主簿吾民無主矣特命斬之
金詔有司為死節士十三人立褒忠廟 十二月
甲辰詔刪修勅令

二年春正月癸亥詔贈陸九齡直秘閣謚文達沈煥直
華文閣謚端憲錄張九成張栻呂祖謙陸九淵子孫官
各有差九淵門人之最著者曰袁燮楊簡沈煥舒璘鄧
人陳塤為太常博士獨為變議謚餘皆閣筆因歎曰幽
厲雖百世不改謚有美惡豈諛墓比哉會朱端常子乞

謚損曰端常居臺諫則逐善類為藩牧則矜刻剥宜得惡謚以戒後來乃謚曰榮愿議出宰相而下皆肅然改

容 癸酉召布衣李心傳赴闕心傳舜臣子也 戊寅

熒惑入氐壬午太白歲星填星合于女 蒙古主以夏

納仇人齊拉袞星根及不遣質子自將伐之二月取黑

水等城

考異薛鑑繫此事于元年十月今據元史太祖紀改政

辛卯御史梁成

大言真德秀有大惡五僅褫職罷祠罰輕詔削二秩

蒙古朶城守將董俊以銳卒數百授史天澤天澤夜赴

真定與實訥台合兵攻武仙仙走西山實訥台怒真定民反覆驅萬人將斬之天澤曰是皆吾民我力不能及一旦委去不幸被脅殺之何罪乃釋之三月戊寅建昭

勲崇德閣趙普曹彬薛居正石熙載潘美李沆王旦李繼隆王曾呂夷簡曹瑋韓琦曾公亮富弼司馬光韓忠

彥呂頤浩趙鼎韓世忠張浚陳康伯史浩葛邲後益以趙汝愚凡二十四人圖形其上是春夏主父遵頊卒

年六十四偽謚曰英文皇帝廟號神宗夏四月辛亥

有流星大如太白 六月丙申賜禮部進士王會龍以
下九百八十九人及第出身時科場事體日壞且有司
命題苟簡或執偏見臆說互相背馳或發策用事訛舛
故士子眩惑莫知適從才者多致見遺所取之士既不
精數年之後復俾之主文是非顛倒逾甚時謂之繆種
流傳復容情任意不學之流往往中第而舉人之弊曰
傳義曰換卷曰易號曰卷子出外曰謄錄滅裂不可勝言
壬寅詔以孔子五十二代孫萬春襲封衍聖公 李

全在青州北剽山東南資江左挾朝廷以疑蒙古蒙古
攻之全大小百戰終不利嬰城自守蒙古築長圍夜布
狗砦全糧援路絕與兄福謀福曰二人俱死無益也汝
身係南北輕重我當死守孤城汝間道南歸提兵赴援
可尋生路全曰數十萬勑敵未易支也全朝出城夕陷
矣不如兄歸於是全留青福還楚 蒙古主避暑于渾
垂山取夏甘肅等州 秋七月戊辰雷電雨晝晦大風
遂安休寧兩縣界山裂洪水壞公宇民居田疇 蒙古

主取夏西涼府擱羅河羅等縣遂踰沙陀至黃河九渡
取應里等縣夏國主德旺憂悸而卒年四十六國人立
其弟南平王睨號德旺曰獻宗睨清平郡王子也 八
月辛卯金設益政院于內庭以禮部尚書樂平楊翼雲
等為說書官日二人直備顧問雲翼為金主講尚書言
帝王之學不必如經生分章析句但知為國大綱足矣
因舉任賢去邪與治同道與亂同事有言逆於汝心有
言遜於汝志等數條一皆本於正心誠意敷繹詳明金

主聽之忘倦一日經筵畢因言人臣有事君之禮有事君之義禮不敢齒君之路馬蹴其芻者有罰入君門則趨見君之几杖則起君命召不俟駕而行受命不宿於家是皆事君之禮人臣所當盡者也然國家之利害生民之休戚一一陳之則向所謂禮者特虛器耳君曰可而有否者獻其否君曰否而有可者獻其可言有不從雖引裾折檻斷鞅輟輪有不惜馬者當是時也姑徇事君之虛禮而不知事君之大義國家何賴焉金主變色

曰非卿朕不聞此言雲翼嘗患風痺及愈金主問愈之
之方對曰但治心耳心和則邪氣不干治國亦然人君
先正其心則朝廷百官莫不一於正矣金主矍然知其
為醫諫也雲翼天性雅重自律甚嚴其待人則寬與人
交分一定死生禍福不少變也博學能文明於正事直
言敢諫與翰林學士趙秉文同為時所重 乙巳追降
巴陵郡公竑為縣公 辛亥衛涇卒 九月徐晞稷罷
以劉瑋為淮東制置使朝廷聞李全為蒙古所圍稍欲

圖之以晞稷畏懦謀易帥劉瑋雅意建閫使鎮江副都
統彭牻延譽牻亦垂涎代瑋從臾尤力故以瑋代晞稷
牻代瑋知盱眙 冬十月甲申詔寧宗御集閣以寶章
為名仍置學士待制員 辛亥熒惑歲星填星合于女
熒惑犯填星 改湖州為安吉州 十一月甲寅修祚
德廟以嚴程嬰公孫杵臼之祀 辛酉熒惑犯歲星
劉瑋至楚州心知不能制馭盱眙四總管惟以鎮江兵
三萬自隨夏全請從瑋素畏其狡不許彭牻自以資望

視瑋更淺曰瑋止夏全是欲遺患盱眙彼猶憚夏全我何能用乃激夏全曰楚城賊黨不滿三千健將又在山東劉制使圖之收功在旦夕太尉曷不往赴事會夏全忻然帥兵徑入楚城時青亦自淮陰入屯城內瑋駭懼勢不容却復就二人謀焉時傳李全已死李福欲分兵赴青州瑋令夏全盛陳兵楚城賊黨震恐李全妻楊妙真遣人賂夏全求緩師乃止蒙古主攻夏靈州夏遣鬼名令公來援蒙古主渡河擊夏師敗之是歲蒙古

烏格台及察罕之師圍金南京遣唐慶責歲幣于金

三年春正月辛亥朔金增築中京城浚汴城外濠 壬

子史彌遠進二秩 以姚朏為淮東制置使朝廷以朏

嘗與李全交驩故命之朏朝辭帝謂曰南北皆吾赤子

何分彼此卿其為朕撫定之朏至楚城東艤舟以治事

間入城見全妻楊氏用徐晞稷故事而禮過之楊氏許

朏入城朏乃入寄治僧寺中極意娛之 己巳詔曰朕

觀朱熹集註大學論語孟子中庸發揮聖賢蘊奧有補

治道朕方勵志講學緬懷典刑深用歎慕可特贈熹太師追封信國公帝訪問熹之徒及所著書部使者遂以葉味道行誼聞差主管三省架閣文字遷宗學諭從臣有薦味道可為講官乃授太學博士兼崇政殿說書故事說書之職止於通鑑而不及經味道請先說論語詔從之帝忽問鬼神之理疑伯有之事涉於誕味道對曰陰陽二氣之散聚雖天地不能易有死而猶不散者其常也有不得其死而鬱結不散者其變也故聖人設為

宗祧以別親疏遠邇正所以教民親愛參贊化育今伯有得罪而死其氣不散為妖為厲使國人上下為之不寧於是為之立子洩以奉其後則庶乎鬼有所依而神莫不寧矣蓋諷濟王竝事也 二月李全妻楊氏使人行成于夏全曰將軍非山東歸附耶狐死兔悲李氏滅夏氏寧獨存願將軍垂矜夏全許諾楊氏盛飾出迎與按行營壘曰人傳三哥死吾一婦人安能自立便當事太尉為夫子女玉帛干戈倉廩皆太尉有望即領此無

多言也夏全心動乃置酒歡甚飲酣就寢如歸轉仇為
好反與李福謀逐劉瑋遂圍楚州治焚官民舍殺守藏
吏取貨物時瑋精兵尚萬人窘束不能發一令太息而
已夜半瑋絕城僅免鎮江軍與賊戰死者大半將校多
死器甲錢粟悉為賊有張正忠不從亂經妻子于庭遂
自焚瑋步至揚州借兵自衛猶劄揚州造旗幟聞者大
笑夏全既逐瑋暮歸楊氏拒之夏全恐楊氏圖己因大
掠趣盱眙欲為亂盱眙將張惠范成進閉城門夏全不

得入狼狽降金朝廷聞之大恐瑋自刎未幾死

考異按宋史李

金傳劉瑋之敗在三年二月薛鑑並叙在二年十一月非也今移于此

三月庚戌朔朱

熹子工部侍郎在入對言人主學問之要帝曰先卿中庸序言之甚詳朕讀之不釋手恨不與之同時 丙寅

封史彌遠為魯國公 史彌遠訪將材于趙葵葵以兄

范對進范淮東提刑兼知滁州范曰弟而薦兄不順以

母老辭乃上書彌遠曰淮東之事日異日新然有淮則

有江無淮則長江以北港汊蘆葦之處敵人皆可潛師

以濟江面數千里何從而防哉今或謂吳辭厚惠可以
啗賊而不知陷彼款兵之計或謂歛兵退屯可以緩賊
而不知成彼深入之謀或欲行清野以嬰城或欲聚烏
合而浪戰或以賊辭之乍順乍逆而為喜懼或以賊兵
之乍進乍退而為寬緊皆失策也失策則失淮失淮則
失江而其失有不可勝悔者矣夫有過寇之兵有游擊
之兵有討賊之兵今竇應之逼山陽天長之逼盱眙須
各增戍兵萬人遣良將統之賊來則堅壁以挫其鋒不

來則耀武以壓其境而又觀釁伺隙時遣偏師掩其不
備以示敢戰使雖欲深入而畏吾之搏其虛此遏寇之
兵也盱眙之寇素無儲蓄金人亦無以養之不過分兵
擄掠而食當量出精兵授以勇校募土豪出奇設伏以
勦殺之此游擊之兵也維揚金陵合肥各聚二三萬人
人物必精將校必勇器械必利教閱必熟紀律必嚴賞
罰必公其心術念慮必人人思親其上而死其長信能
行此半年而可以強國一年而可以討賊矣賊既不能

深入擄掠無復所獲而又懷見討之恐則必反而求贍
於金金無餘力及此則必怨之怒之吾於是可以嫁禍
於金人矣或謂揚州不可屯重兵恐速賊禍是不然揚
州者國之北門一以統淮一以蔽江一以守運河豈可
無備哉善守者敵不知所攻今若設寶應天長二屯以
扼其衝復重二三帥閫以張吾勢賊將不知所攻而敢
犯我揚州哉朝廷乃召范稟議復令知池州 是春蒙
古主留兵攻夏王城自率師渡河攻金積石州遂破臨

洮府金總管圖們呼圖美死之又破洮河西寧二州遣
烏珍納延攻信都府拔之夏四月蒙古主次龍德拔
德順府金節度使愛申攝府判馬肩龍死之陝西行省
進三策上策自將出戰中策幸陝州下策棄秦保潼關
金主不從五月壬子以岳珂為戶部侍郎兼淮東總
領制置使李全青州被圍一年食牛馬及人且盡將
自食其軍全欲降懼衆異議乃焚香南向再拜欲自經
而使其黨鄭衍德田四救己曰譬如為衣有身愁無袖

耶今北歸未必非福全乃降蒙古蒙古諸將皆曰全勢窮出降非心服也今若不誅後必為患博囉曰不然誅一人易耳山東未降者尚多全素得人心殺之不足以立威徒失民望表聞蒙古主詔博囉便宜處之乃以全為淮南楚州行省鄭衍德田世榮副之由是郡縣聞風款附 蒙古主遣唐慶等使金 六月戊申朔日有食之 劉慶福在山陽不自安欲圖李福以贖罪福亦謀殺慶福二人互相猜忌福稱疾不出慶福往候福殺之

納其主于姚朮大喜楚州自夏全之亂儲積無餘綱
運不續賊黨籍籍謂福所致福畏衆口數見朮促之朮
謝以朝廷撥降未下福乘衆怒與楊氏謀召朮飲朮至
而楊氏不出就坐賓次左右散去福以朮命召諸幕客
杜耒等以楊氏命召朮二妾諸幕客知有變不得已而
往耒至八字橋福兵腰斬之又欲害朮鄭行德救之得
免去鬚鬢縋城夜走歸明州死朝廷以淮亂相仍遣帥
必斃始欲輕淮而重江楚州不復建閫就以其帥楊紹

雲兼制置改楚州為淮安軍命通判張國明權守視之
若羈縻州然 蒙古主避暑六盤山金遣完顏哈周鄂
屯阿呼來請和蒙古主謂羣臣曰朕自去冬五星聚時
已嘗許不殺掠遽忘下詔耶今可布告中外令彼行人
亦知朕意 蒙古盡克夏城邑其民穿鑿土石以避鋒
鏑免者百無一二白骨蔽野是月夏國主覲力屈出降
遂繫以歸夏立國二百餘年抗衡宋遼金三國徇鄉無
常視三國之勢強弱以為異同至是乃亡時諸將多掠

子女財幣完律楚材獨取書數部大黃兩駝而已既而
軍士病疫唯得大黃可愈楚材用之所活萬人 秋七
月乙酉太陰犯心 己丑蒙古主特穆津殂于薩里川
疾草謂左右曰金精兵在潼關南據連山北限大河難
以遽破若假道于宋宋金世讐必能許我則下兵唐鄧
直擣大梁金急必徵兵潼關然以數萬之衆千里赴援
人馬疲敝雖至弗能戰破之必矣言訖而殂年六十六
葬起輦谷是為太祖深沉有大畧用兵如神故能滅國

四十遂平西夏凡六子長曰卓沁性卞急而善戰早卒
二曰察罕台性慎密為衆所畏三曰諤格德依是為太宗
四曰托壘是為睿宗其庶子曰穆爾徹爾岱曰阿裕爾至
是托壘監國 丙午史彌遠乞歸田里詔不允 蒙古
自鳳翔侵京兆關中大震 李全之黨以軍糧不繼屢
有怨言全將國安用闔通歎曰我曹米外日受銅錢二
百楚州物賤可以樂全而劉慶福為不善怨仇相尋使
我曹無所衣食時張林邢德亦在楚自謂嘗受朝廷恩

中遭全間貳今歸于此豈可不與朝廷立事王義深嘗
為全所辱又自以賈涉帳前人與彭義斌舉義不成而
歸五人相謂曰朝廷不降錢糧為有反者未除耳乃共
議殺李福及全妻楊妙真以獻遂帥衆趣妙真家福走
出邢德手刃之相屠者數百人有郭統制者殺全次子
通及全妾劉氏妄稱楊妙真函首獻于楊紹雲送之臨
安傾朝皆喜八月檄知盱眙軍彭牝及總管張惠范成
進時青併兵往楚州便宜盡戮李全餘黨牝輕儼不為

惠等所服得檄不自決請制府及朝廷處之朝議以時
青望重檄青區畫青恐禍及密遣人報全于青州遷延
不決惠成進以朝檄專委青而不及已乃歸盱眙設燕
邀托乘其醉縛之渡淮以盱眙降于金金人俾惠專制
河南以拒蒙古而使總帥完顏額克戍之

考異金史哀
宗紀正大三

年十一月夏全自楚州來歸楚州王義深張惠范成進
以城降封四人為郡王改楚州為平淮府按金正大三
年實宋寶慶之二年也夏全以寶慶二年降于金而
張惠等至是年始降非同時事今從宋史李全傳

甲戌太白熒惑合于翼 丙子城太平州 九月癸未

賜故觀文殿大學士魏國公留正謚忠宣 丙午加謚

寧宗曰法天備道純德茂功仁文哲武聖睿恭孝皇帝

李全得時青報慟哭力告蒙古大將求南還不許全

因斷一指以示之誓還南必叛蒙古大將乃承制授全

山東淮南行省得專制山東歲獻金幣 冬十月丙辰

全遂與蒙古張宣差及通事數人還楚州服蒙古衣冠

文移紀甲子而無年號楊紹雲聞其至遂留揚州王義

深奔金國安用殺張林邢德以自贖郭統制亦為全所

殺尋復誘殺時青并其衆 甲子右監門衛大將軍與
弼改賜名貴謙繼沂王後右千牛衛將軍孟杓改賜名
乃裕繼景獻太子後 十一月辛巳改明年為紹定元
年 金封李全為淮南王全不受時全敗完顏額克于
龜山故也 十二月己酉日旁有氣如珥 蒙古兵入
京兆復破關外諸隘至武階四川制置使鄭損棄沔州
遁三關不守金人盡棄河北山東關陝唯並力守河南
保潼關自洛陽三門集津東至邳州之崔鎮東西二千

餘里立四行省帥精兵二十萬以守禦之議者乞謹邊
備以防南侵帝命樞臣采其計 蒙古史天澤在真定
繕城壁修武備以高公抱犢諸砦乃武仙之巢穴帥兵
破之仙走入汲縣天澤復取相衛蟻尖馬武等砦 蒙
古兵薄西和州知州陳寅率民兵晝夜苦戰援兵不至
城遂陷寅謂妻杜氏曰若速自為計杜厲聲曰安有生
同君祿死不共王事者即飲藥自殺二子及婦俱死毋
旁寅殮而焚之乃朝服登戰樓望闕焚香號泣曰臣始

謀守此城為蜀籬籬城之不存臣死分也再拜伏劍而
死賓客同死者二十有八人寅寶謨閣待制咸子也

資治通鑑後編卷一百三十七

欽定四庫全書

資治通鑑後編卷一百三十八

刑部尚書徐乾學撰

宋紀一百三十八

起著雍困敦正月盡重光單閼十二月凡四年

理宗建道備德大功復興烈文仁武聖明安孝皇

帝

紹定元年春正月丙子朔上壽明慈睿皇太后冊寶於慈明殿 庚辰金遣完顏瑪爾楚如蒙古弔慰 二月

乙巳朔金大寒雷雨雪木之華者盡死 癸丑金詔有

司以臨洮總管圖們呼圖美塑像入褒忠廟書死節子

孫於御屏量材官使之 夏四月丙寅金親衛軍王約

囉酗酒殺其孫大理寺當以徒刑特命斬之 六月壬

寅朔日有食之

考異金史哀宗紀是年十二月庚子朔書日食而六月日食不書恐誤今從宋

史理宗紀及天文志

己酉流星晝墮

秋七月戊戌熒惑犯南

斗 李全在海州厚募人為兵不限南北官軍多亡應

之天長民保聚為十六砦比歲失業官賑之不能繼壯

者皆就募射陽湖浮居數萬家有兵仗侵掠不可制
其豪周安民谷汝礪王十五長之亦蠶結水砦以觀成
敗全知東南利舟師謀習水戰米商至悉併舟買之留
其柁工一以教十遣人泛江湖市桐油黏筏厚募南匠
大治舳舻船自淮及海相望至是與楊氏大閭戰艦於
海洋八月全趣青州為嚴實及石小哥邀擊敗走遂奪
青崖峒據之小哥珪子也九月全歸海州治舟益急驅
諸峒人習水 冬十月戊申熒惑犯壁壘陣星丁巳熒

惑填星合於危甲子熒惑犯填星十一月李全至楚

州以糧少為辭遣海舟入平江嘉興實欲習海道以覘

畿甸然山東經理未定而歲貢蒙古者不可缺故外恭

順朝廷以就錢糧因以貨貨輸蒙古朝廷亦以全往來

山東得少寬北顧之憂遣餉不輟全日縱游說於朝謂

當復建閫山陽又與金合從約以盱眙與之金亦遣使

聘全皆不遂癸酉熒惑入羽林庚辰雷十二月辛

亥以薛極知樞密院事葛洪參知政事臨安府尹袁韶

同知樞密院事端明殿學士鄭清之僉書樞密院事

考異

宋史袁韶傳云嘉定十三年韶為臨安府尹至紹定元年拜參知政事薛鑑因之於是年正月書曰以袁紹參知政事按理宗紀及宰輔表皆云十二月辛亥除同知樞密院事未嘗有參政之拜本傳既書參政又不言除也今不取

金完顏瑪爾楚以奉使不職免死除名

改命完顏納新克蒙古國信使是歲言官言舉人程

文雷同或一字不差其獎有二一則考官受賂或授暗

記或與全篇一家分傳謄寫一則老儒賣文場屋一人

傳十十人傳百考官不暇參稽於是命禮部戒飭前申

號三日監試會聚考官將合取卷參驗稍涉雷同者即落或仍前弊考官監試一例黜退

二年春正月庚辰大理司直張衍上檢驗推鞠四事詔刑獄人命所關其令有司究行之 丁亥熒惑歲星合

於婁 時李全反叛已著史彌遠尚視為緩圖人不敢言權兵部郎李宗勉累疏及之又上言欲人謀之合莫若通下情人多好誦揣所悅意則侈其言度所惡聞則小其事上既壅塞下亦欺誣則成敗得失之機理亂安

危之故將孰從而上聞哉不聞則不戒待其事至乃駭
而圖之抑已晚矣欲財計之豐莫若節國用善為國者
常使財勝事不使事勝財今山東之旅坐糜我金穀湖
南江右閩中之寇蹂踐我州縣苟浮費泛用又從而侵
耗之則漏卮難盈蠹木易壞設有緩急必將窘於調度
而事機失矣欲邦本之固莫若寬民力州縣之間聚斂
者多椎剝之風浸以成習民生窮蹙怨憤莫伸嘯聚山
林勢所必至救焚拯溺可不亟為之謀哉 二月庚戌

詔歲舉廉吏或犯姦賊保任同坐監司守臣其申嚴覺
察 金右司諫陳規左拾遺李大節上言三事一將帥
出兵每為近臣牽制不得專輒二近侍送宣傳旨公受
賂遺失朝廷體三罪同罰異何以使人金主嘉納之

三月辛卯詔郡縣繫囚多瘐死獄中憲司其具獄官姓
名以聞黜罷之 蒙古兵入金大昌原金樞密院伊拉
布呼以忠孝軍總領完顏陳和尚為前鋒陳和尚擐甲
上馬以四百騎大敗蒙古八千之衆士氣皆倍自蒙古

發難二十年間僅有此捷奏功第一名震國中授定遠
大將軍世襲穆昆忠孝軍皆回紇奈曼羌渾及中原被
俘避罪來歸者驚很難制唯陳和尚御之有方坐作進
退皆中程式所過州縣秋毫無犯居街曲間不聞喧雜
每戰則先登陷陣疾若風雨諸將倚以為重

考異陳經
通鑑續編

云蒙古兵入大昌原金平章政事完顏哈達以忠孝軍
提控完顏陳華善為前鋒薛應旂因之按金史哀宗紀
是年二月以丞相完顏薩巴行尚書省事於關中召平
章政事完顏哈達還朝伊喇布哈率忠孝軍總領完顏
陳和尚忠孝軍一千騎駐邠州然則以陳和尚為前鋒
者布哈也非哈達也又按陳華善有戰功正在是年三

月續編繫上年三月亦誤今並正之

夏四月庚申詔郡縣官闕毋令藝

術人豪民罷吏借補權攝五月辛巳賜進士黃朴以

下五百五十七人及第出身詔戶絕者許立嗣毋妄

籍沒金隴州防禦使舒穆魯都齊進黃鸚鵡詔曰外方

獻珍禽異獸違物性損人力令勿復進蒙古太祖伐

金定西域攻城畧地之功諤格德依居多八月諤格德依自和

博果來會喪耶律楚材以太祖遺詔召諸王畢會請立

諤格德依托壘監國諸王意猶豫未決楚材言於監國

此社稷大計若不早定恐生他變監國乃與諸王奉詔
格德依即位於和林東庫特默烏喇哩之地時庶事草創
禮儀簡率楚材始定冊立禮儀俾皇族諸王尊長皆就
班列以拜又中原新定未有號令長吏皆得自專生殺
楚材以為言命禁絕之 九月壬辰有流星大如太白
改封朱熹徽國公用鄒克例也 金遣阿固岱歸蒙
古太祖之賄蒙古主曰汝主久不降使先帝老於兵間
吾豈能忘也賄何為哉却之遂議伐金冬十月蒙古兵

入慶陽界金詔陝西行省遣使奉羊酒幣帛乞緩師請
和 壬戌詔台州水災除民田租及茶鹽酒酤諸雜稅
郡縣抑勒者監司察之 十一月己丑熒惑入氏 十
二月蒙古始置倉廩立驛傳命河北漢民以戶計出賦
調耶律楚材主之西域人以丁計出賦調瑪哈穆特烏
喇默色主之又以史天澤劉哈瑪爾蕭扎拉為萬戶分守
中原 蒙古圍慶陽金詔伊喇布哈等救之 是歲金
復遣使聘蒙古蒙古不受

三年春正月甲申追封故皇子緝為永王諡冲安 壬

辰知棗陽軍史嵩之勅置屯田以勞賞轉兩官 金伊

喇布哈等敗蒙古兵於慶陽遂解圍去 二月丙申日

有背氣 庚戌起復趙范趙葵節制鎮江滁州軍馬范

葵時丁母憂求解官不許卒哭乃俱視事 壬子追封

故皇子釋為昭王諡冲純 蒙古立十路課稅所初太

祖征西域倉庫無斗粟尺帛之儲於是羣臣咸言雖得

漢人亦無所用不若盡殺之使草木暢茂以為牧地耶

律楚材曰夫以天下之廣四海之富何求而不得不
為耳何名無用哉因奏地稅商稅酒醋鹽鐵山澤之利
周歲可得銀五十萬兩絹八萬匹粟四十餘萬石太祖
曰誠如卿言則國用有餘矣卿試為之至是楚材奏十
路課稅所設使副二員悉用士人如陳時可趙昉劉中
等皆在選中楚材因間進說周孔之教且謂天下雖得
之馬上不可以馬上治蒙古主深然之由是文臣漸用
閏月癸酉逃卒穆椿夜竊入皇城縱火焚御前軍器

庫衛士捕得之磔於市時李全欲銷朝廷兵備故遣椿
為亂於是先朝甲仗燒毀殆盡 乙酉太白歲星合於
畢 三月丁酉雨土 五月甲寅以李全為彰化保康
節度使開府儀同三司京東鎮撫使全不受命初全欲
先據揚州以渡江分兵徇通泰以趣海其下皆曰通泰
鹽場在焉莫若先取為家計且使朝廷失鹽利全欲朝
廷不為備又不敢絕其給乃挾蒙古李宗二宣差以恫
疑虛喝而蒙古實未嘗資全兵李宣差則青州賣藥人

人也既而復遣張國明至臨安稟議全以金寶資其行
賓從所過楊言李宣差英略絕倫騎射五百步朝廷莫
若裂地王之與增錢糧使當邊境徧餽要津求主其說
國明入見以百口保全不叛朝廷雖知其姦姑事苟安
不之詰及全糴麥舟過鹽城知揚州翟朝宗嗾尉兵奪
之全怒以捕盜為名水陸數萬徑擣鹽城戍將陳益樓
彊知縣陳遇皆遁全入城據之朝宗倉皇遣幹官王節
懇全退師全不許留鄭祥董友守鹽城而自提兵還楚

州以狀白於朝曰遣兵捕盜過鹽城縣令自棄城遁去
慮軍民驚擾不免入城安衆朝廷乃授全節鉞令釋兵
命制置司幹官耶律均往諭之全曰朝廷待我如小兒
啼則與果不受制命朝廷為罷朝宗命通判趙璫夫攝
州事先是士大夫無賢愚皆策全必反而不敢言國子
監丞度正獨上疏極言之且獻斃全之策有三其言鯁
亮激切時不能用至是趙范趙葵以全必反為慮累疏
力言之史彌遠不納 蒙古兵圍京兆金將率師救之

為蒙古所敗城遂陷 秋七月丁酉汀州寧化縣曾寡

婦晏氏給軍糧禦漳寇有功又全活鄉民數萬人詔封

恭人賜冠帔官其子承信郎 武仙既歸金金復封為

恒山公置府衛州八月史天澤合諸軍圍之金將完顏

哈達率衆來援蒙古兵皆北天澤獨以千人繞出其後

合兵攻之仙逸去屯胡嶺關天澤遂取衛州 九月丙

午進封美人謝氏為貴妃 冬十月己巳熒惑填星合

於室 以趙善湘為江淮制置使時李全造舟益急至

發塚取黏板煉鐵錢為釘熬囚脂為油灰列炬繼晷招沿海亡命為水手又給趙璫夫以蒙古為辭邀增五千人錢糧求誓書鐵券朝廷猶遣餉不絕全得米即轉入鹽城以贍其衆他軍士見者曰朝廷唯恐賊不飽我曹何力殺賊射陽湖人皆怨至有養北賊戕淮民之語聞者太息全又遣人以金牌誘脅周安民等造浮橋於諭口以便鹽城往來時史彌遠多在告諸執政又不以為意獨鄭清之深憂之力勸帝討全帝乃以善湘制置江

淮許便宜從事然猶內圖進討外用調停惟趙范趙葵兄弟力請進兵討之初蒙古使額古楞至陝西議和金行省伊犁布哈等懼其泄事機留之及布哈既解慶陽之圍志意驕滿乃遣額古楞還謂之曰我已準備軍馬能戰則來額古楞還見蒙古主白之蒙古主怒即與其弟托壘帥衆入陝西於京兆同華間破砦柵六十餘所遂趣鳳翔金以完顏哈達及布哈行省事於閬鄉以備潼關十一月丁酉有星孛於天市垣丁未流星

畫墮 十二月庚申詔錄用孔子四十九代孫燦 李
全突至揚州副都統丁勝拒之全攻南門趙璫夫得史
彌遠書許增萬五千名糧勸全歸楚州遣劉易就全壘
示之全笑曰史丞相勸我歸丁都統與我戰非相紹耶
擲書不受璫夫恐亟發牌印迂趙范於鎮江范亦刻日
約葵葵帥雄勝寧淮武定強勇四軍萬四千赴之時全
引兵攻泰州知州宋濟迎降全入坐郡治盡收其子女
貨幣將趨揚聞范葵已入揚城乃揚鄭衍德曰我計先

取揚州渡江爾曹勸我取通泰今二趙已入揚州江其
可渡耶既而曰今惟有徑搗揚州耳遂分兵守泰而悉
衆攻揚州至灣頭立砦據運河之衝使胡義將先鋒駐
平山堂以伺三城機便全攻東門葵親搏戰全將張友
呼城門請葵出葵出與全隔濠立馬相勞苦問全來何
為全曰朝廷動見猜疑今復絕我糧餉我背叛索錢糧
耳葵曰朝廷待汝以忠臣孝子而乃反戈攻陷城邑朝
廷安得不絕汝錢糧汝云非叛欺人乎欺天乎全無以

對彎弓抽矢向葵而去自是屢戰全兵多敗全每云我
不要淮上州縣渡江浮海徑至蘇杭孰能當我然全志
吞揚州三城而兵每不得傳城下宗雄武獻策曰城中
素無薪且儲蓄為總領所支借殆盡若築長圍三城自
困全乃恚衆及驅鄉農凡數十萬列砦圍三城制司總
所糧援俱絕范葵命三城諸門各出兵劫砦舉火為期
夜半縱兵衝擊殲賊甚衆自是全一意長圍以持久困
官軍不復薄城全張蓋奏樂於平山堂布置築圍范葵

令諸門以輕兵牽制親帥將士出堡砦西攻之全分兵
諸門鏖戰自辰至未殺傷相當管兵王青力戰死之明
日范出師大戰獲全糧數十艘葵亦力戰敗之事聞贈
王青官 時揚州告急飛檄載道都城有爭逃避者乃
以同知樞密院事袁韶為浙西制置使仍治臨安鎮遏
之史彌遠懲韓侂冑用兵事不欲聲討韶與范楷言於
彌遠曰失揚則京口不可保淮將如卞整崔福皆可用
適福以事至韶夜與同見彌遠言福實可用彌遠從之

遂討全 乙丑以鄭清之參知政事端明殿學士喬行
簡同僉書樞密院事 詔史彌遠敷奏精敏氣體向安
朕未欲勞以朝謁可十日一赴都堂治事 丁卯立貴
妃謝氏為皇后后天台人丞相深甫之孫也生而顰黑
臂一目父渠伯早世產業破壞后躬親汲飣帝即位議
擇中宮楊太后以深甫有援已功命選謝氏女謝氏止
有后一人在室兄弟欲納入宮諸父擇伯不可曰納女
當厚奉資裝異時不過一老宮婢耳會元夕縣有鵲來

巢燈山衆以為祥擇伯不能止乃供送后就道后旋病
疹良已膚脫瑩白如玉醫又藥去目醫遂與賈涉女同
入宮賈女有殊色帝欲立之太后曰謝女端重宜正中
宮左右亦相竊謂曰不立真皇后乃立假皇后耶帝不
能奪賈妃專寵後宮后處之裕如不以介懷太后益賢
之帝禮遇日加陳埴上言乞去君側之蠱媚以正主德
從天下之公論以新庶政蓋指賈妃及彌遠也彌遠謂
埴曰吾甥殆好名耶埴曰好名孟子所取也夫求士於

三代之上惟恐其好名求士於三代之下惟恐其不好名耳力求去出判嘉興府蒙古兵拔金天勝砦及韓城蒲坂是歲臣僚請學校場屋命題試士並禁斷章截句破壞義理

四年春正月戊子朔皇太后年七十有五帝詣慈明殿行慶壽禮大赦壬寅趙范趙葵大敗李全於揚州時全浚圍城塹范葵遣諸將出揚州東門掩擊全走土城官軍躡之蹂溺甚衆范陳於西門賊閉壘不出葵曰賊

俟我收兵而出爾乃伏騎破垣間收步卒誘之賊兵數
千果趣濠側李虎力戰城上矢石雨注賊退有頃賊別
隊自東北馳至范葵揮步騎夾浮橋吊橋並出為三迭
陣以待之自己至未與賊大戰別遣虎等以馬步五百
出賊背而葵率輕兵橫衝之三道夾擊賊敗走始全謀
反已成然多顧忌且懼其黨不順而邊陲喜事者欲挾
全為重遂激成之及趙善湘趙范趙葵用事聲罪致討
罷支錢糧攻城不得累戰不利全始大悔忽忽不樂或

令左右把其臂曰是我手否人皆怪之范葵夜議所向
葵曰出東門范曰西出嘗不利賊必見易因其所易而
圖之必勝不如出堡塞西門是夕全張燈置酒高會平
山堂有候卒識全檣垂雙拂以告范謂葵曰賊勇而輕
出必成擒詰朝乃悉精銳數千而西張官軍素為賊所
易之旗幟全望見喜謂李宋二宣差曰看我掃南軍官
軍見賊突闖而前范麾兵並進葵親搏戰諸軍爭奮賊
欲走入土城李虎軍已塞其甕門全窘從數十騎北走

葵帥諸將威之全趣新塘新塘自決水後淖深數尺會
久晴浮戰塵如燥壤全騎過之皆陷淖中不能自拔官
軍追及奮長槍刺之全呼曰無殺我我乃頭目羣卒碎
其尸而分其鞍馬器甲并殺三十餘人皆將校也全死
餘黨欲潰國安用不從議推一人為首莫肯相下欲還
淮安奉全妻楊妙真范葵追擊大破之乃散去范還揚
州葵使人瘞新塘骸骨得左掌無一指盖全支解也捷
聞加趙善湘江淮制置大使范淮東安撫使葵淮東提

刑善湘季子汝楫史彌遠壻也奏請無阻而善湘亦以
范葵進取有方慰藉殷勤故能成功 蒙古圍金鳳翔
府金行省完顏哈達伊喇富哈逗遛不進金主遣樞密
判官白華往諭之哈達富哈言北兵勢盛不可輕進白
華還金主復遣諭以鳳翔圍久恐守者不能支可領軍
出關畧與渭北軍交手彼大軍聞之必當奔赴少紓鳳
翔之急哈達富哈乃始出關行至華陰與渭北軍交戰
比晚收軍入關不復顧鳳翔矣 初盜起閩中朝廷以

陳韡為福建路招捕使討平之至是又躬往邵武督捕
餘寇賊首晏彪迎降韡以彪力屈方降非其本心斬之
時衢盜汪徐來二破常山開化勢張甚韡令淮將李大
聲提兵七百出賊不意夜薄其砦賊出迎戰見算子旗
驚曰此陳招捕軍也皆大哭韡令急擊之衢境悉平

夏四月丁丑以鄭清之兼同知樞密院事喬行簡僉書
樞密院事 蒙古取金鳳翔完顏哈達伊喇布哈遷京

兆民於河南使完顏陳華善戍之

考異元史太宗紀是
年二月克鳳翔今從

金史哀
宗紀

金完顏陳華善敗蒙古將蘇布特於倒回谷

趙范趙葵復帥步騎十萬攻鹽城屢敗賊衆遂薄淮
安城殺賊萬計焚二千餘家城中哭聲震天五月丙戌
朔淮安五城俱破斬首數千燒砦柵萬餘家淮北賊歸
赴援舟師擊之焚其水柵夷五城餘址賊始懼王旻趙
必勝全子才等移砦西門與賊大戰又破之全妻楊妙
真謂鄭衍德等曰二十年梨花槍天下無敵手今事勢
已去撐拄不行汝等未降者以我在故爾今我欲歸老

漣水汝等請降可乎衆曰諾翼日妙真遂絕淮而去其黨即遣馮珣等納款軍門趙范許之淮安遂平諸將皆望不次拔擢或言於史彌遠彌遠曰譬如養鷹餓則休人飽則颺去曹彬下江南太祖猶不肯以使相與之況今遑戍未撤警報時聞若諸將一一遂其所求志得意滿猝有緩急孰肯效死賞遂不行楊妙真構浮橋於楚州之北就蒙古帥索隆噶圖乞師為李全報讐金人覘知之以為北兵果能渡淮淮與河南跬步間耳乃使

完顏哈達伊喇富哈戍激河口時八里莊民叛遂守將
而納之金金以八里莊為鎮淮府 六月己未詔魏了
翁真德秀尤熿尤燭並叙復官職祠祿 國安用從楊
妙真走山東降於蒙古蒙古以為都元帥行省山東
金降人李昌國言於蒙古托壘曰金遷汴將二十年其
所持以安者潼關黃河耳若出寶雞以侵漢中不一月
可達唐鄧大事集矣托壘然之白於蒙古主蒙古主乃
會諸將期以明年正月合南北軍攻汴遣托壘先趣寶

雞蘇巴爾罕來假道淮東以趣河南且請以兵會之秋七月蘇巴爾罕至沔州青野原統制張宣殺之托壘聞蘇巴爾罕死曰宋自食言背盟棄好今日之事曲直有歸矣

己丑日生承氣 庚戌參知政事葛洪罷知紹興府洪

初從呂祖謙學在政府贊計李全援王素諫仁宗却王

德用進女事以止備嬪御杜範稱其侃侃守正有大臣

風 有流星大如太白 八月辛酉詔洪咨夔叙復官

職祠祿 蒙古托壘分騎兵三萬入大散關攻破鳳州

徑趣華陽屠洋州攻武休開生山截焦崖出武休東南
遂圍興元軍民散走死於沙窩者數十萬分軍而西西
軍由別路入沔州取大安軍路開魚鰲山撤屋為筏渡
嘉陵江入閬堡並江趣葭萌畧地至西水縣破城砦百
四十而還東軍屯於興元洋州之間以趣饒風關蒙
古始立中書省改侍從官名以耶律楚材為中書令時
蒙古主至雲中諸路咸進廩藉及金帛陳於庭蒙古主
笑曰卿何使錢幣流入如此即自授以中書印俾領其

事事無巨細一以委之楚材奏請諸路州縣長吏專理
民事萬戶府專總軍政課稅所專掌錢穀各不相統攝
著為令又舉鎮海紐赫重山為左右丞相與之同事權
貴不得志燕京路長官舒穆魯咸德布激怒皇叔額哲使
奏楚材用南朝舊人恐有異志不宜重用因誣構百端
必欲寘於死地鎮海紐赫重山等懼讓楚材曰何為強
更張必有今日事楚材曰立朝廷以來每事皆我自為
諸公何預焉若果獲罪我自當之蒙古主察額哲之誣

逐其使者已而咸德布為人所訴帝命楚材鞫治楚材
奏曰此人倨傲故易招謗今方有事南方他日治之未
晚也蒙古主私謂近侍曰楚材不校私讐真寬厚長者
汝曹當效之 蒙古主以高麗殺使者命徹爾台率師
討之取四十餘城高麗王曦遣其弟懷安公請降徹爾
台承制設官分鎮其地乃還 九月丙戌夜臨安火延
及太廟三省六部御史臺秘書省玉牒所俱燬惟丞相
史彌遠府獨全以殿帥馮梈率衛卒力救之也帝素服

減膳徹樂宰執降官封一等太常少卿度正以宗廟之制未合於古為二說以獻其一則用朱熹之議其一則因本朝廟制而參以熹之議自西徂東為一列每室之後為一室以藏祧廟之主如僖祖廟以次祧主則藏之昭居左穆居右後世穆之祧主藏太祖廟昭之祧主藏太宗廟仁宗為百世不遷之宗後世昭之祧主則藏之高宗為百世不遷之宗後世穆之祧主則藏之室之前為兩室三年祫享則帷帳幕之通為一室盡出諸廟主

及祧廟主並為一列合食其上往者此廟為一室凡遇
祫享合祭於室名為合享而實未嘗合享今增此三室
後有藏祧主之所前有祖宗合食之地於本朝之制初
無更革而頗已得三年大祫之義編管官李心傳亦上
疏言宜舉行之詔兩省侍從臺諫集議遂求直言籍田
令徐清叟上疏乞為濟王置後以和異氣帝不省校書
郎蔣重珍疏曰臣頃進本心外物界限之說蓋欲陛下
親攬大柄不退託於人盡破恩私求無媿於已儻以富

貴之私視之一言一動不忘其私則是以天下生靈社稷宗廟之事為輕而以身富貴之所從來為重不惟上負天命與先帝聖母至於公卿百執事之所以望陛下者亦不如此也昔周勃今日握璽授文帝是夜即以宋昌領南北軍霍光今年定策立宣帝而明年稽首歸政今臨御八年未聞有所作為進退人才興廢政事天下皆曰此丞相意一時恩怨雖歸廟堂異日治亂實在陛下焉有為天之子為人之主而自朝廷達於天下皆

言相而不言君哉天之所以火宗廟火都城者殆以此
臣所痛心者九廟至重事如生存而徹小塗火不防於
火之未至宰相之居華屋廣袤而焦頭爛額獨全於火
之未然亦足以見人心陷溺知有權勢不知有君父矣
他有變故何所倚仗陛下自視不亦孤乎昔史浩兩入
相才五月或九月即罷孝宗之報功寧有窮已顧如此
其亟何哉保全功臣之道可厚以富貴不可久以權也
負外郎吳潛上疏論致災之由曰願陛下齋戒修省恐

懼對越菲衣惡食必使國人信之母徒減膳而已疎損
聲色必使天下孚之母徒徹樂而已閭官之竊弄威福
者勿親女寵之根萌禍患者勿昵使皇天后土三軍百
姓知陛下有憂畏之心然後明詔二三大臣和衷竭慮
力改絃轍收召賢哲選用忠良毋並進君子小人以為
包荒毋兼容邪說正論以為皇極庶幾天意可回易亂
為治矣 丙申金慈聖皇太后溫都氏殂慈聖太后仁
聖太后之姊金主之母也本姓王氏賜姓溫都氏后性

端嚴頗達古今金主已立為太子有過尚切責之及即位始免榎楚一日宮中就食尚器有玉盃櫟三一奉太后二奉帝及中宮荆王守純母真妃龐氏則以瑪瑙器進食后見之怒召主者責曰誰令汝妄生分別荆王母豈卑我兒婦耶是後宮中奉真妃有加或告守純謀不軌下獄議已決金主言於后后曰汝止一兄奈何以讒言害之章宗殺伯與叔享年不永皇嗣又絕汝何為效之耶趣赦出使來見我金主起后立待守純至涕泣慰

撫之金主嘗寵一宮人欲立為后后惡其微賤固命出之金主不得已放之出宮點檢薩哈連教金主騎鞠后戒之曰汝為人臣當輔主以正顧乃教之戲耶再有聞必大杖汝矣比年小捷文士有奏賦頌以聖德中興為言者后聞不悅曰帝年少氣銳無懼心則驕怠生今幸一勝何等中興而若輩諂之如是至是殂於慈聖宮遺命園陵制度務從儉約葬汴京迎朔門外莊獻太子墓之西諡明惠皇后 甲辰流星晝墮 蒙古主將兵圍

河中急金僉樞草火額克元帥板子額克懼軍力不足
截故城之半以守蒙古築松樓高二百尺下瞰城中土
山地穴百道並進晝夜力戰樓櫓俱盡白戰又半月力
竭城陷草火額克猶親搏戰數十合始被擒就死板子
額克以敗卒三千奪船走閭鄉初板子額克在鳳翔為
監戰奉御陸爾所制有隙及改河中總帥同赴召陸爾
遂譖額克奉旨防秋畏怯違避金主信之至是怒其不
能死節因杖殺之而額克皆內族一得賊好以草火燒

之一嘗誤呼宮中牙牌為板子時人因以別之金自南渡後內侍之權尤重蓋宣宗喜用其人以為耳目伺察百官故奉御輦採訪民間號行路御史或得一二事入奏之即抵罪又方面之柄雖委將帥復差一奉御在軍中號曰監戰每臨機制變多為所牽制遇敵輒先奔故師多喪敗以至亡國

史臣曰草火額克力戰而死板子額克亦力戰不死於陣而死於刑論者以為近侍先入之言夫以贊御監軍

既掣之肘又信其讒以殺人金失政刑矣唐之亡坐以近侍監軍金蹈其轍哀哉

冬十月甲子以余天錫為戶部侍郎兼知臨安府浙西安撫使 戊寅以李埴為四川制置使知成都府趙彥呐副之知興元府初彥呐治西和五年安丙以為可用待之甚厚崔與之代丙獨謂彥呐大言無實必誤國事不可付以邊閫朝廷不從至是竟以為臺副 蒙古以高麗殺使者著古遣兵伐之 十一月乙酉詔忠義總

管田遂力戰而死贈官加封立廟 蒙古托壘攻陷饒


風關由金州而東將趣汴京民皆入保城堡險阻以避
之金主召宰執臺諫入議皆曰北軍冒萬里之險歷二
年之久方入武休其勞苦已極為吾計者以兵屯睢鄭
昌武歸德及京畿諸縣以大將守洛陽潼關懷孟等處
嚴兵備之京師積糧數百萬斛令河南州郡堅壁清野
彼欲攻不能欲戰不得師老食盡不擊自歸矣金主太
息曰南渡二十年所在之民破田宅鬻妻子以養軍士

今敵至不能迎戰徒欲自保京城雖存何以為國天下
其謂我何朕思之熟矣存亡有天命惟不負吾民可也
乃詔諸將屯襄鄧十二月完顏哈達伊喇布哈帥諸軍
入鄧州陳和尚楊沃衍武仙兵皆會之遂出屯順陽戊
辰蒙古兵渡漢江哈達布哈召諸將議曰由光化截江
與戰及縱之渡而後戰孰是張惠安德穆皆曰截江便
縱之渡則我腹空虛必為所潰布哈不從丙子蒙古兵
畢渡哈達布哈始進至禹山分據地勢列步卒於山前

騎士於山後蒙古兵至大帥以兩小旗前導來觀觀竟
不前陣散如鴈翅轉山麓出金騎兵之後分三隊而來
哈達曰今日之勢未可戰也俄而蒙古騎兵突前金兵
不得不戰短兵接三合蒙古少却其在西者望布哈親
軍繞甲騎後而突之金富察鼎珠力戰始退哈達曰彼
衆號三萬而輜重居其一今相持二三日彼不得食吾
乘其卻而摧之必勝矣布哈曰江路已絕黃河不水彼
入重地將安歸乎何以速為遂不逐明日蒙古兵忽不

見已卯邏騎還始知在光化對岸棗林中晝作食夜不下馬望林中往來不五六十步而四日不聞音響庚辰哈達布哈議入鄧州就糧辰已間到林後蒙古忽至哈達布哈迎戰交綏之際蒙古以百騎邀輜重而去金兵幾不成列逮夜二鼓哈達布哈乃入鄧州城懼軍士迷路鳴鐘招之哈達布哈隱其敗以大捷聞百官表賀諸相置酒省中左丞李蹊且喜且泣曰非今日之捷生靈之禍可勝言哉於是民保城壁者皆散還鄉社不數日

蒙古游騎突至多被俘獲



資治通鑑後編卷一百三十八